



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

იერემია იბერიელი

იერემია იბერიელი, V ს. ქართველი სასულიერო მოღვაწე. კ. კეკელიძის მოსაზრების თანახმად, იგი იგივე იერემია ურჭაელია. მას ბერძნულიდან ქართულად უნდა ეთარგმნა IV ს. თხზულება „დიდაჰე“, ანუ „ათორმეტთა მოციქულთა მოძღვრება“. კონსტანტინოპოლში არსებულ „დიდაჰეს“ ამ ნუსხაში იერემია ურჭაელი თავს „ყარიბობის გამო თავისიანებსა და სამშობლოს დაშორებულ ქართველ მართლმადიდებელს“ უწოდებს.

იერემია ურჭაელი (იგივე ი. ი.) იმ სას. პირთა შორისაა დასახელებული, რ-ებიც უგზოობის გამო (ყველა გზა ზღვასა და ხმელეთზე შეკრული იყო) 431 ქ. ეფესოში შემდგარ ანტინესტორულ მსოფლიო საეკლ. კრებას ვერ დაესწრნენ და 431 წ. 13 აგვისტოს კონსტანტინოპოლიდან კრების მესვეურებს წერილი მისწერეს. წერილში ი. ი. ხელს ასე აწერს: „Yeremia Iberos partium Persidis“, ე. ი. თავს ქართლის „სპარსული ნაწილის“ ეპისკოპოსად ასახელებს.

431-თვის ქართლი რადგან ისევ ბიზანტიასა და ირანს შორის გაყოფილ ქვეყნად რჩებოდა, ი. ი. ირანელთა გავლენაში მყოფი ეპისკოპოსი უნდა ყოფილიყო (კ. კეკელიძე მას მთელი ქართლის ეპისკოპოსად თვლიდა). 439 ქართლი მთლიანად ირანს დაექვემდებარა. ი. ი-მა შესაძლოა ამ დროს დატოვა ქართლი და ქ. ურჭაში (ედესა, ანტიოქია) გადასახლდა, რის შემდეგაც „ურჭაელად“ იწოდდა. ძვ. წყაროებში რადგან „ურჭა“ და „ქართლი“ ზოგჯერ იდენტური შინაარსის ტერმინებად იხმარებოდა (იაკობ სპარსის კოპტურ ვერსიაში პეტრე იბერი ურჭაელად იწოდება), გამორიცხული არ არის, ი. ი. „იერემია ურჭაელადაც“ მოეხსენიებინათ.

ლიტ.: გოილაძე ვ., ასურელ მამათა სამშობლო და საქართველო, თბ., 2002;
კეკელიძე კ., იერემია იბერიელი, წგ.: ეტიუდები ძველი ქართული ლიტერატურის
ისტორიიდან, ტ. 1, თბ., 1956.